

P O E S I E A M O R O S E
S A S T R E S R O S A S

1.

Si mi bastat sa mente, hap' a cantare
Tre rosas chi furadu m' hant su coro;
No, nd' hant bidu in sos tempos insoro
Né sos ch'in custu mundu sunt passende:
Una rosa incarnada sò amande.

2.

De las cantare m' incontr' intrattesu.
Si mi bastat sa ment' est pro fortuna.
De sas tres rigirende sò pro una
Sa pius adornada ch' est in mesu;
Mai non si nd' hat bidu ne intesu
Issa dogni fior' est superande.

3.

Issa superad' a dogni fiore,
No che nd' hat un' atèra bella, tantu;
Custa Rosa ch' a m'hat fatt' incantu
No est sa manna e nei- sa minore;
Da-e cando hap' a issa post' amore
Est su sentidu meu regirende.

4.

Est regirende su meu sentidu
Est un' accisu su ch' hat fattu a mie:
Isto poninde sa notte pro sa die
Chi no nde pas' abbizzu ne dormidu,
Non mi la potto ponner in olvidu
Anzis si nd' est de me appoderende.

5.

S'appoderat de me custa belleza
Mai mi nd' essidi da-e memoria;
Como non sò piusu a manu mia
A la lassare, sa pesson' est presa,
Cun sos colores tuos, Ros' azzesa,
Sas chi sunt in su rattu ses mudande.

6.

Tue mudas sas rosas de su rattu,
A tottus bettas sas luguras tuas.
Rosa chi ses naschid' in mes' 'e duas
Però ses tue su primu retrattu.
Reina de sas rosas t' hana fattu
Chi sos fiores ti sunt corteggiende.

7.

Finis: mai mi nd' essis da-e testa,
C' hapo presente sa tua bellura,
Rosa ch' ettas tanta risplendura
A sas chi giughes a manca e a dresta.
Bella, condo cun tegues fatto festa,
Mi parzo de sa vida rinnovende:
Una rosa incarnada sò amende.